



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.411/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët Hidajete Gashi Alaj, kryesuese, Ramush Bardiqi dhe Arsim Hamzaj, anëtarë, duke vendosur lidhur me ankesën e Fjolla Mazrekaj, kandidate për anëtare të Kuvendit Komunal në Komunën e Deçanit, nga radhët e subjektit politik Lidhja Demokratike e Kosovës (LDK), me seli në Prishtinë, dega në Deçan, paraqitur kundër vendimit të Komisionit Qendror të Zgjedhjeve (KQZ), Nr. 01/3093-2025 i datës 03.11.2025 për shpalljen e rezultateve përfundimtare të Zgjedhjeve Lokale në Republikën e Kosovës për Kuvendet Komunale të mbajtura me datën 12 Tetor 2025, në seancën e panelit të mbajtur, më datë 07.11.2025, merr këtë:

V E N D I M

REFUZOHET e pabazuar ankesa ZL.Anr.411/2025, e datës 05.11.2025, parashtruar nga Fjolla Mazrekaj, kandidate për anëtarë të Kuvendit Komunal në Komunën e Deçanit, nga radhët e subjektit politik Lidhja Demokratike e Kosovës (LDK), me seli në Prishtinë, dega në Deçan, paraqitur kundër vendimit të Komisionit Qendror të Zgjedhjeve (KQZ), Nr. 01/3093-2025 i datës 03.11.2025 për shpalljen e rezultateve përfundimtare të Zgjedhjeve Lokale në Republikën e Kosovës për Kuvendet Komunale të mbajtura me datën 12 Tetor 2025.

A r s y e t i m

Më datë 03.11.2025, PZAP-i ka pranuar ankesën ZL.Anr.411/2025, nga Fjolla Mazrekaj, kandidate për anëtarë të kuvendit komunal në Komunën e Deçanit, nga radhët e subjektit politik Lidhja Demokratike e Kosovës (LDK), me seli në Prishtinë, dega në Deçan në të cilën thekson se gjatë procesit të numërimit dhe paraqitjes së rezultateve në QKN ka konstatuar parregullsi në plotësimin e formularëve të FRK, ku këto parregullsi kanë ndikuar në zvogëlimin e numrit real të votave të vlefshme që i janë dhënë duke i shkaktuar dëm të konsiderueshëm në rezultatin përfundimtar. Parashtruesja e ankesës ka theksuar se, vendvotimet në të cilat ka dyshime për shkeljen e integritetit të procesit zgjedhor të bartjes së votave janë: QV 0111-vv/01,02,03; QV 0109-vv/03,04; QV 0102-vv/02,03,05; QV 0101-vv/01,04,05; QV 0108-vv/01,02; QV 0113-vv/01,02. Parashtruesja e ankesës thekson se gjitha këto vendvotime janë zonat ku kanë votuar familjar dhe të afërmit e saj ku e njëjta pikërisht për këtë arsye dyshon se ka pasur shkelje nga komisioneret gjatë bartjes së votave. E njëjta thekson se si prova mund të shfrytëzohen formularët e rezultatit të kandidateve për Kuvend Komunal nga vendvotimet e lartcekura dhe e njëjta kërkon që të urdhërohet rinumërimi fizik dhe verifikimin e kutive të votimit të listuar, të rishqyrtoj formularët FRK për Kuvendin Komunal në Deçan, të siguroj krahasimin e të

dhënave në mes të formularëve original, sistemit të KQZ dhe fletëve fizike dhe nëse konstatohet mospërputhje, te urdhërohet korrigjimi dhe publikimi i versionit te caktuar nga PZAP-i.

Në përgjigjen në ankesë KQZ-ja thekson se bazuar në nenin 101 të Ligjit Nr., 08/ L-228 për Zgjedhjet e Përgjithshme në Republikën e Kosovës (LZP), Rregulloren Zgjedhore Nr.16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhjet Lokale 2025, e miratuar më 01.10.2025, Nr.01/2601/2025, përcaktohet procedura e detajuar lidhur me procesin e numërimit në QKN. Rezultatet preliminare nga vendvotimet mund të korrigjohen në Qendrën Komunale të Numërimit, në përputhje me paragrafin 3 të nenit 14 të Rregullores Zgjedhore Nr. 16/2024 për Qendrat Komunale të Numërimit (QKN). Andaj, bazuar në Rregullën Zgjedhore Nr.13/2024 Rezultatet e Zgjedhore nenin 9 paragrafi 1 thekson se: Në rast të mospërputhjes së rezultateve, KQZ-ja mund të urdhëroj rinumërimin e votave të cilit do W, ose edhe përsëritjen e votimit në një VV apo QV. KQZ, gjithashtu ju njoftoj se, procesi i numërimit të votave në Qendrën e Numërimit dhe Rezultateve (QNR) është zhvilluar në përputhje me Rregulloren Zgjedhore Nr., 14/2024, Qendra e Numërimit dhe Rezultateve (QNR) ku ekipet e numërimit kanë bërë numërimin e votave të kandidatëve në transparencë të plotë, ku fletëvotimi është prezantuar në ekran dhe është parë nga vëzhguesit e akredituar. Pala ankuese, ndër të tjera, ka pretenduar se disa nga familjarët, votues kanë votuar për të, mirëpo, sipas saj mungojnë votat e tyre. Ky pretendim nuk mund të vërtetohet, pasi që vota është e fshehtë dhe, në përputhje me parimet e fshehtësisë dhe lirisë së votës, dhe po ashtu në fletëvotim nuk mund të identifikohet emri i votuesit. Sa i përket pretendimeve të palëve ankuese e cila mbështetet në pritshmërinë dhe deklaratimet e personave, dhe familjareve të tij, duhet theksuar se, në kuptim të nenit 4 paragrafi 1.3 të Ligjit për Zgjedhjet e Përgjithshme, liria dhe fshehtësia e votës janë të garantuara. Publikimi i votës cenon këtë parim dhe shpërfaq vullnetin e votuesit. Në kuptim të nenit 117 paragrafi 3 të LZP, gjatë shqyrtimit të ankesës është vërejtur se pala ankuese, nuk ka bashkëngjitur prova relevante, që do të mund të dëshmonin apo mbështesnin pretendimet saj, për mungesën e votave të pretenduara në vendvotimin e lartcekur dhe parregullsitë që pala pretendon. Gjithashtu, pala ankuese në ankesën e saj ka ngritur pretendime që lidhen me administrimin e punës në Qendrën e Komunale të Numërimit (QKN). Sipas nenit 105 të Ligjit Nr. 08/L-228 për Zgjedhjet e Përgjithshme në Republikën e Kosovës, ankesat që kanë të bëjnë me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga momenti i ndodhjes së shkeljes së supozuar. Andaj, KQZ ju njofton se nga deklarata e ZEKKZ në Deçan procesi i numërimit dhe administrimit të punës së QKN në Deçan ka përfunduar me datë 15.10.2025 në ora 15:00.

Paneli Zgjedhor për Ankesa dhe Parashtresa - PZAP, pas shqyrtimit të ankesës dhe shkresave të lëndës vlerëson se:

Ankesa është e pabazuar.

Paneli, pas shqyrtimit të pretendimeve ankimore lidhur me ankesën ZL Anr. 411/2025 dhe përgjigjes në ankesë të KQZ-së, vlerësoj se pretendimet në ankesën e parashtruar nga Fjolla Mazrekaj, kandidate për anëtarë të Kuvendit Komunal në Komunën e Deçanit, nga radhët e subjektit politik Lidhja Demokratike e Kosovës (LDK), në të cilën thekson se gjatë procesit te

numërimit dhe paraqitjes së rezultateve në QKN ka konstatuar parregullsi në plotësimin e formularëve të FRK, ku këto parregullsi kanë ndikuar në zvogëlimin e numrit real të votave të vlefshme në rezultatin përfundimtar, për Panelin këto pretendime janë të pa qëndrueshme dhe si të tilla i refuzoj për faktin se nga pretendimet e theksuara në ankesë se ka mungesë të votave të publikuara me numrin real të votave për të cilat thekson se do të duhej ti ketë, paneli nuk ka arritur që të vërtetoj se ka pasur shkelje apo parregullsi për të cilat pala ankuese pretendon me ankesën e saj, kjo pasi që paraqitësja e ankesës nuk i ka bashkangjitur ankesës asnjë provë dhe nuk ka arritur me ankesë të argumentoj pretendimet e saj se i mungojnë votat, ndërsa pretendime e theksuara në ankesë tani për tani mbeten në nivel të supozimit nga se nuk janë argumentuar me fakte dhe me prova konkrete.

Me nenin 101 paragrafi 3 të Ligjin Nr.08/L-228 Për Zgjedhjet e Përgjithshme në Republikën e Kosovës, përcaktohet se *“votat për kandidatët e subjekteve politike numërohen në qendrat komunale të numërimit të fletëvotimeve për kandidatë”*, ndërsa paragrafi 13 i këtij neni përcakton se: *“të dhënat dhe rezultatet për çdo vendvotim dërgohen për tabulim në QNR menjëherë pas përfundimit të punës së çdo ndërrimi. Kopjet e formularëve të rezultateve skanohen, publikohen dhe vendosen në vende të qasshme për vëzhguesit, si dhe ju ofrohen subjekteve politike dhe kandidatëve, sipas kërkesës”*.

Rregulla Zgjedhore e KQZ-së Nr. 16/2024 Qendrat Komunale të Numërimit neni 18 paragrafi 1 përcakton se *“pas mbylljes së kutisë së votimit, rezultatet dhe formularët skanohen dhe publikohen në web faqen e KQZ-se, vendosen të qasshme në QKN për vëzhguesit dhe ju ofrohen subjekteve politike dhe kandidatëve sipas kërkesës.”*

Paneli, vlerësoi se ankesa është e pabazuar dhe e pa argumentuar, pasi që parashtresja e ankesës nuk ka bashkangjitur prova bindëse, apo ndonjë dëshmi, formularët e rezultateve të subjekteve politike dhe të kandidatëve, librin e votimit, deklaratat e KVV apo dokumente të tjera, me të cilën do të vërtetoheshin këto pretendime, edhe pse në bazë të nenit 117 paragrafi 3 të Ligjin Nr.08/L-228 Për Zgjedhjet e Përgjithshme në Republikën e Kosovës, barra e të provuarit bie mbi ankuesin, në të cilin nen përcaktohet se *“Vendosja për ankesat nga PZAP-ja mbështetet në dëshmi të qarta dhe bindëse”*. Paneli vlerësoj se pretendimet e tilla janë të pa qëndrueshme dhe si të tilla i refuzoj, për faktin se nga veprimet e përshkruara në ankesë dhe në mungesë të provave si dëshmi parashtresja e ankesës nuk ka arritur që të vërtetoj pretendimet e theksuara si më lartë

Nga arsyet e theksuara më lartë dhe duke u bazuar në nenin 117 paragrafi 3, lidhur me nenin 118 paragrafi 1 të Ligjin Nr.08/L-228 Për Zgjedhjet e Përgjithshme në Republikën e Kosovës, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa

ZL.Anr.411/2025 më datën 07.11.2025

Kryesues i Panelit
Hidajete Gashi Alaj



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes pranimit të këtij vendimi.